

Codaa

cadota ante nänö yewæmongainta

Waa quëwencæminimpa, ante Codaa yewæmongampa

¹Botö Itota Codito ingante në cædömo inte Tantiago töninabo Codaabo inömo imopa. Mæmpo Wængongui minitö iminite waadete pönëninque aa pecä pömini ininque minitö Itota Codito nempo në ongömini iñöminite botö, Acæminimpa, ante yewæmömopa.

²Wængongui waadete pönö piyænë cæcä ininque minitö tömengä nänö gänë entawënö ædæmö entawëninque nanguï waadete pönente waa cæte quëwencæminimpa, ante yewæmömopa.

Babæ ante në odömonte apænedäni (2 Pegodo 2.1-7)

³Botö në waadedömini ëñeedäni. Botö, Codito ængä beyænque mönö quëwëmämo æbänö i, ante quingæ yewæmoncæte ante cæyöмотe wadäni wënæ wënæ cædäni ate wædinque botö, Minitö wææ cæedäni, ante yewæmonguënëmo batabopa. Wængongui quimö iñömonte tömengä iñömö, Wede mini pönëno ante pönömo æninque minitö cöwë wææ aaedäni, ante æmäwo pöni pædæ pönongä ænte entawëmompä. Ininque botö wæætë, Wede mini pönëno ante wææ cæcæminimpa, ante yewæmonguënëmo intabopa. ⁴Wængongui, Botö imote në Baa änäni nani pante wæquinque wentamö mongænänipa, ante tömënäni inänite apænte äninque piingampa, ante do yewæmongatimpa. Tömënäni iñömö minitö weca do awëmö pönänipa cæminii. Wængongui

pönö waadete nänö cægäinö ante tömënäni wapiticæ cædinque, Minitö baonque townenque mini cæinënö ante önonque cæcæminimpa, ante cædinque Wængongui waadete pönö cæcampa, ante babæ ante odömonte apænedänipa. Ayæ Itota Codito adocanque mönö Tæiyæ Awënë iñongante tömënäni iñömö tömengä ingante Baa änänipa.

⁵Minitö wæætë tömänö ante ëñënimini iñöminite botö, Do mini ëñëninö ante wæætë wæætë adodö ante pönencæminimpa, ante cædinque adodö ante yewæmoncæ cæbo aedäni. Dodäni Equitobæ quëwëñönänite mönö Awënë ænte mäocä godäni ate tömengä në wede pönënamai inäni inänite edæ, Ömäe, ante capo wænongå wængadänimpa. ⁶Ayæ anquedoidi në awëneidi inönäni incæ pancadäniya tömënäni nani aagäinö incæ ñimpo cædinque tömënäni nani quëwengaiñömö emö cædinque wadæ gogadänimpa. Adinque Wængongui, Botö apænte anguiönæ iinque bayonte tömënäni inänite botö pancæboimpa, ante ñöwo iñömö gæguincamenca wodämai inguimenca tæi goti wininque tömënäni inänite wëmö iñömö mangui tee mönete wææ cæcampa. ⁷Ayæ Todömä iñömö quëwengainäni tönö Gömoda iñömö quëwengainäni eyequei godongämæ nani quëwengaincabo nani quëwengaincabo tönö adobaï wënæ wënæ cædinque nänöögängä inämai iñongante godö möninque ayæ godömenque quingämë bai wiwa tote quëwengadänimpa. Mänömai cæte quëwënäni ate Wængongui angä

gonga wææ tí wocæno gonte æmæwo wængadänimpa. Mänömaí godö pangä nani wængai bai ante odömöninque Wængongui, Nè wænæ wænæ cædäni adobaí gonga cöwë yædæ yædæ bæcoyömö caate wæquínänidö anguënë, ante mönö imonte odömoncæte ante cægacäimpa.

⁸Ayæ wiimonte bai mä pönente në odömonte apænedäni iñömö ñowo minitö weca pöninque dodäni nani cægaí bai adobaí pöní cædänipa. Wiwa cædinque tömënäni wentamö mongænte bai edæ baö ñömængui ëñädänipa. Awënëidi inänite edæ Baa änanipa. Ayæ anquedoidi öönædë ñäö iñömö quëwënäni inänite edæ babæ äninque wænæ wænæ ante tedewënanipa. ⁹Incæte anquedo awënë Miiguedo incæ tömënäni piinte nani tedewëno bai adobaí tededämaí ingacäimpa. Möitee wodi baö ini adinque anquedo Miiguedo tönö wænæ awënë iñömö edæ, Æbänö cæquií, ante guëadó guëa angadäimpa. Äñönote Miiguedo iñömö, Botö në apænte anguënëmo imopa diyæ anguimoo, ante pönëninque guiñente wædinque wænæ awënë ingante, Wænæ wænæ cæbipa töö, ante piinte änämaí ingacäimpa. Wæætë, “Wængongui incæ bitö imite Baa angä ëñencæbiimpa,” angacäimpa. ¹⁰Ñowodäni iñömö tömënäni adämaí inte nani ëñänämaí inönö ante edæ piiniquede do wiwa tedewënanipa. Wæætë babæidi nani ëñenonque ante ëñëninque tömënäni mäninonque ante nani cædö beyæ wænte nani ñömænguinque godömenque quingämë bai cædänipa.

¹¹Tömënäni edæ nani Ca ca wæquinque baquínö anguënë. Caínö wodi nänö gogainö incæ edæ do godänipa. Ayæ Badäo wodi, Nanguí æncæboimpa, ante cædinque tömengä nänö oda cægainö incæ tömënäni iñömö adodö ante pogodo godinque, Godömenque nanguí æncæboimpa, ante oda cædänipa. Ayæ Codee wodi, Awënëidi inänite wido cæcäimpa, ante

nänö cægainö bai cædinque ñowodäni nani wænguinque adobaí cædänipa.

¹²Minitö waadete pönëninque godongämæ ponte cænömöni iñäni iñömö guiñänämaí inte adoyömö ponte cænänipa. Minitö tönö godongämæ ongönäni beyænque mini cabo wentamö baate bai ëmömöni awædö. Tömënäni, Nè aawëmöni imönipa, ante babæ apænedinque në cænänäni bai inäni inänite pædæ godönämaí inäni inte tömënäninque ade cænte bai cædinque wií nöinö ante odömonte apænedänipa töö. Ayæ waodäni, Cöönæ cæ tobäimpa, ante wæyönänite boguimancoo cöönæye ëmöñonte woboyæ pö wido cæ bai cædinque tömënäni nani, Pönömöni æncæminimpa, äninö ante pönönämaí inte edæ babæ cædänipa. Ayæ awæ incayedë ömæcawæ í adinque do bæ wite mempoga wæniwæ bai inäni inte tömënäni mempoga wænte bai inäni inte, Pönömöni cæncæminimpa, ante në babæ änewënäni inänipa. ¹³Ayæ gäwapæno tadömengadæ ompota öñöñö mängonta mängonta cædinque ompota yabæ tayönöi edonque öñö ai bai tömënäni wiwa cæyönäni wentamö nani entawëno adobaí edonque pöní ongö acäimpa. Ayæ nëmö adodonque goquënë incæ oo tobæ wæænte wëmö ba bai tömënäni adobaí oda cæte wapiticæ godäni inte edæ tömënäni nani cöwë tadämaí wæwëginque mä mämönte bai iñömö edæ godäni inänipa.

¹⁴Ayæ Adäo wodi nänö mömoidi wææ nänö mömoidi wææ nänö mömocä ingaingä inte Ënoco iñömö tömengä Wængongui beyæ apænedinque dodäni babæ ante në odömonte apænedäni inänitedö ante iimaínö ante apænegacäimpa. “Mönö Awënë pongä apa quëwënäni. Ayæ tömengä quínäni tæiyæ waëmö inäni adobaí miido ganca mänimpodäni pöñönänite adopo adopo edæ pö pö cædinque önompo tipæmpoga mänimpoga pönäni inte bacoo inäni mönö Awënë tönö godongämæ poncædänimpa. ¹⁵Tömengä mänömaí pöninque edæ

tömämö ïmonte apænte ancæcäimpa. Wængongui ingante nê Baa änanî inänite tömengä, Minitö minî wæwente baquinque botö ïmote Baa äninque edæ ëñënamäi cæminîpa töö, ancæcäimpa. Ayæ, Mîni nê Baa änoncabo inöminî inte mînitö minî wæwente baquinque edæ botö ïmote piïnte äninque wiwa äminîpa. Ämo ëñëmaiminîpa, ante edonque apænecæte ante mönö Awënë poncæcäimpa.” Mänömainö ante Ënoco wodi wëenëñedë pönî angacäimpa. ¹⁶Nöwodäni æbämë cædäni incæ nê babæ ante odömonte apænedäni inömö, Quimæ quëwëë, ante piïninque piyænë cædämaï inänîpa. Taadö ante tömënäni nämä nänî cæinëwënonque ante tee empote godänîpa. Botö godömenque waa pönî cæbo aedäni, ante nämä ængö cædinque tedewënänîpa. Ayæ, Wadäni mönitö wædö ante pönö cæcædänîmpa, ante babæ cædinque tömënäni wadäni inänite waa ate bai tededinque waa pönî cæte bai godö apænedänîpa cæminîi.

**Nê pönëminî inömö iïmaï
cæcæminîmpa, ante**

¹⁷Minitö guiquënë botö nê waademîni ëñëedäni. Mönö Awënë Itota Codito nänö nê da godongainäni incæ, Æbänö baquïi, ante nänî apænëgainö ante iïmainö ante pönëedäni. ¹⁸Tömënäni inömö mînitö iminite apænedinque, “Wodo iïmæca iinque bayonte edæ wadäni nämä nänî toinëwente godönö ante goquinäni incæ Wængongui ingante Baa ante badete toquinäni inönäni inte edæ do poncædänîmpa,” ante apænedäni ëñëminîtapa. ¹⁹Iinäni nê badete todäni inömö Wængongui Önöwoca ingante ewocadämaï inäni inte edæ nämä nänî cæinënö ante ëñente cædänîpa. Minitö adocabomîni inöminite tömënäni, Nänëneto nänënë gocæminîmpa, ante cædinque pä cæte bai cædäni inänîpa.

²⁰Botö nê waadedömîni edæ iïmaï cæedäni. Minitö mönö Tæiyæ Waëmö pönî inongä ingante wede pönëminî inte mäninö minî wede pönënö incæ dica tæï gö cæte ongonca bai impa.

Ante adinque mînitö oncö dicaboga mænonte bai edæ tæï piñäninque godömenque cæedäni. Ayæ Wængongui Tæiyæ Waëmö Önöwoca ingante ewocadinque mînitö, Tömengä æbänö angää, ante ëñëninque mäninonque ante Wængongui ingante apæneedäni. ²¹Minitö, Mönö Awënë Itota Codito pönö waadete waa cæcä beyænque mönö wænämaï inte cöwë wantæpiyæ quëwengäimpa, ante æncæte ante wänö cömînitawo. Ininque Wængongui nê waadete pönengä nempo cöwë waadete pönëninque ongödäni.

²²Pancadäniya guiquënë, Wabänö quëwenguïmoo, ante guïñente wæyönänite mînitö tömënäni inänite piïnte adämaï inte godö waadete waa cæedäni. ²³Pancadäniya guiquënë gonga bæcöyömö oo goquinäni imai impa, ante adinque mînitö wæætë, Quëwencædänîmpa, ante odömonte apænedinque tömënäni inänite ö æminî beyænque quëwencædänîmpa. Wadäni guiquënë wiwa cædäni inte nämä baö wentamö mongænte bai ëñayönänite mînitö, Näate wæcæ wæ, ante guïñente wædinque tömënäni weocoo nänî nädincoo incæ gampodämaï inte tömënäni beyæ wæætë waadete godö waa cæedäni.

**Wængongui waëmö pönî
ëmönongä ingampa, ante**

²⁴Minitö tæ go wæænte bai oda cædämaï incæminîmpa, ante Wængonguinque eyepæ pönî inongä inte töö æmængä ate mînitö adiyæ ongonte bai wede pönencæminîmpa. Ayæ tömengä adocanque eyepæ pönî cædongä inte pönö badongä ate mînitö waimîni bamîni ininque mînitö nanguï pönî minî watapæ toquinque tömengä nänö nãö ëmöñömö ænte mæicä æicæminîmpa. ²⁵Wængongui adocanque pönî inongä inte mönö ïmonte, Quëwencæminîmpa, ante nê Ængaingä ingampa. Ininque Itota Codito mönö Awënë nänö cægainö beyænque eyepæ bate quëwëmö inömö mönö iïmainö

ante apæ necæimpa. Wængonguí ēñēmi.
 Bitō badongaincoo ðæ añonte wēēnē
 imāmoque iñonte ñōwopāmo iñonte
 wapāmo miimāmo iinque bayonte
 bitō adobique cōwē ñāō entawente

tæi emōninque Awēnē nē tæi piñæmi
 inōmi inte tōmāo iñōmō quēwēnāni
 inānite nē Ānōmi imidō anguēnē, ante
 mōnō apæ necæimpa. Mānōmai baquīnō
 anguēnē, ante botō, Amēē, āmopa.